

夢占類考

夢占類考卷三

長洲張鳳翼伯起編

飛鳥部

鳥

一鳥文彩異常

晉羅含幼孤爲叔母朱氏所養嘗晝臥夢一鳥文彩異常飛入口中因驚起說之朱氏曰鳥有文彩汝後必有文章自此後藻思日新仕爲江夏從事太守謝尚曰可謂湘中之琳瑯後補桓溫參軍或謂含荆楚之才溫曰此自江左之秀豈惟荆楚而已

紫色大鳥

張鷟字文成爲兒童時夢紫色大鳥五彩成文降於庭其祖謂之曰五色赤文鳳也紫文鷟鷟也爲鳳之佐吾兒當以文章瑞於明庭因以爲名字初登進士第對策尤工又應下筆成章及才高位下詞標文苑等科鷟凡應八舉皆登甲科員外郎員半千謂人曰張子之文如青錢萬簡選中未聞退時時流重之目爲青錢學士天下之人無賢不肖皆記誦其文天后朝中使馬仙童陷默啜默啜謂仙童曰張文成在否曰近自御史貶官默啜曰國有此人而不川漢無能爲也新羅日本東夷諸蕃尤重其文每遣使入朝必重出金貝以購其文其才名遠播如此

# 大鳥止所居

蕭克翁隱居不仕學行爲州里所推嘗夢大鳥止其所居翼覆軒外舉家驚異出戶視之冲天而去明日魯思溫自順陽來從學克翁爲易其名曰翀而字之曰子翬子翬竟以文學政事知名官至翰林侍講學士贈行省叅知政事封郡公謚文靖

元史

## 白鳥墜雲

贊皇尉張師夢白鳥飛翔墜於雲際旣覺心神恍惚召董賀卜之賀卽決卦慘然而問曰朝來寢息不有夢乎必若有夢其飛禽之象乎且雷震山上鳥墜雲間聲跡兩消不

可復見樂天委命而已師是年七十一竟不起

吐鳳

揚雄作甘泉賦成夢口吐白鳳

鳳集手上

大業中有孫姓者夢鳳鳥集手上以爲善徵以問蕭吉吉  
曰不祥孫以爲妄後十餘日遭母喪乃遣所親往問吉吉  
云鳳鳥非梧桐不棲非竹實不食所以止君手上者手中  
有桐竹之象也禮云苴杖竹也削杖桐也是以知必有重  
憂耳

大業拾遺記其集鳳記所載以占夢者爲宋董補異

金鳳銜珠

詳珍寶部許遜

靈鳳集身

詳黃冠部王遠知

五色雲化鳳

詳天象部徐陵母

鸞鳥入室

黃梅尉聶新妻陳夢鸞鳥入室旦而育女後歸黃簡肅公  
封夫人享年七十有二

升菴文集

鶴  
九鶴自天而下

張九齡母夢九鶴自天而下飛集於庭遂生九齡爲唐賢

相唐書

駕鶴冲天

李抱真以司空平章事居重鎮晚節好方士有孫季長者  
爲抱真鍊金丹抱真夢駕鶴冲天寤而刻木鶴衣道士衣  
以習乘之凡服丹二萬丸腹堅不食將死道士牛洞玄以  
猪肪穀漆下之殆盡病少間季長復曰垂上仙何自棄也  
益服三千丸而化去

飛鳴過我

蘇子與客遊於赤壁之下反而登舟放乎中流時夜將半  
頃寂寥適有孤鶴橫江東來翅如車輪玄裳縞衣戛然

長鳴掠予舟而西也須臾客去予亦就睡夢一道士羽衣  
蹣跚過臨臯之下揖予而言曰赤壁之遊樂乎問其姓名  
俛而不荅嗚呼噫嘻我知之矣疇昔之夜飛鳴而過我者  
非子也耶道士顧笑予亦驚悟開戶視之不見其處

蘇集

### 黃鶴從天飛來

顧文康鼎臣生時父年已五十文康旣壯每夜焚香祈父  
壽願以已壽益親令見已成立以伸孝養一夕夢黃鶴從  
天飛來近視之卽所焚表也後一大院字末有硃批數行  
云自此以後如田單火牛通行無滯蓋乙丑之兆也父享  
年八十餘及見文康及第云

狀元錄



旌旗鶴鴈降庭

詳旂常部富弼

鸚鵡兩翅俱折

唐則天后夢一鸚鵡羽毛甚偉兩翅俱折以問宰相內史狄仁傑曰鸚鵡者陛下姓也兩翅折者陛下二子廬陵相王也陛下起此二子兩翅全矣武承嗣武三思面項皆赤後契丹圍幽州檄朝廷曰還我廬陵相王來則天乃憶狄公之言曰卿曾爲我占夢今乃應矣朕欲立太子何者爲得傑曰陛下內有賢子外有賢姪取舍詳擇斷在聖衷則天曰我自有聖子承嗣三思是何疥癬承嗣等懼掩耳而走

卽降勅追廬陵立爲太子充元帥初募兵無有應者聞太子行北邙山頭皆兵滿無容人處賊自退散

唐史

烏

烏集啓上

宋景公無子取公孫周之子得與啓畜諸公宮未有立焉於是六卿三族降聽政因大尹以達大尹常不告而以其欲稱君命以令國人惡之冬十月公游於空澤辛巳卒於連中大尹興空澤之士千甲以公命召六子至以甲劫之盟曰無爲公室不利大尹立啓奉喪殯于大宮三日而後國人知之得夢啓北首而寢於廬門之外已爲烏而集於其上味加於南門尾加於桐門口余夢美必立大尹謀曰

我不在盟無乃逐我復盟之乎使祝爲載書六子在唐孟  
將盟之皇氏戴氏皆歸授甲使徇于國曰大尹惑盪其君  
以陵虐公室與我者救君者也衆曰與之大尹奉啓以奔  
楚乃立得

左傳

### 赤烏若龍戲

豐公家于沛之豐邑中陽里其妻夢赤烏若龍戲已而生  
執嘉是爲太上皇

帝王世紀

### 烏鵲群集其下

信州刺史蕭遇少孤將改葬母于舊塋至攢處悞啓他墓  
旣而知其非號慟而歸夜忽夢戶外有聲呼遇小名曰吾

是爾母遇驚走出戶拜迎見其母母從暗中出遇與相見如平生謂遇曰汝至孝動天神祇降鑒令我與汝相見遇乃述迷悞瑩域之恨母曰吾來亦爲此吾墓上已有李五娘墓且已平坦何可辨也汝明日但見烏鵲羣集其下是已遇聞言卽驚寤哀號待曉至其處果見有烏鵲集平地乃掘之得李五娘墓更於下得母墓方扶歸葬云

通幽記

燕 玉燕投懷

張說母夢玉燕投懷遂生說爲唐名相封燕公

定命錄

鴛鴦 兩瓦化爲鴛鴦

詳棟宇部魏文帝

鷄化爲鸚

西施母有娠夢五色鷄自天而下化爲鸚飛去遂產女是爲西施

白鷄

詳什百部謝安曰鷄主酉太歲在酉病不起也

鷄 小罪受鷄身

詳輪迴部石壁寺老僧

走獸部

獸 猛獸超叢棘

北齊馬敬德中第後其妻夢猛獸將來向之敬德走超叢

棘妻伏地不敢動敬德占之曰吾當得大官超棘過九卿也爾伏地夫人也已而世祖爲後主擇師趙彥深進之入爲侍講武平初以師傅恩超拜國子祭酒加儀同三司金紫光祿大夫領瀛州大中正後封廣漢郡王

北史

### 牽五色獸逼衣

五代王宗俛妻有娠夢周公山神牽五色獸逼其衣遂生承肇承肇稍長有異僧見而撫之曰老僧所居周公山佳氣減半乃孕靈此子耶後節制揚州入洛爲行軍司馬

州志

雅

### 猛獸斷盤囊

走獸

詳地理部邵殷

麟入室

長興顧母楊氏有娠夢麟入室寤而生子遂名應祥後舉進士敷歷有聲官至南京刑部尚書贈太子少保

弁州集

麟虞

尚書劉公麟夢麟虞而得曾孫符卿陸公師道作歌云君不見煌煌丹穴五色雛渥洼之產汗血駒鳳毛龍子自有種隨地便與凡禽殊劉宗積德天下無尚書聲光照寰區公侯子孫必復始感應吉夢來麟虞白質黑章照山水鬱鬱紫氣佳城隅笑喚吾家雪色狸心知非熊亦非羆詰朝

冢孫舍懸弧始信占夢言非誣錦祿見公顏玉立耽耽雄  
視回清矚吾聞庭堅作理祀英六始生白虎開貞符騶虞  
之祥亦此類行繩祖武陳臯謨何須更試啼聲爽但請徵  
之白澤圖

陸符卿集

獅

五色獅子

王敬則母爲女巫常謂人曰敬則生時胞衣紫色應得鳴  
鼓角人笑曰汝子得爲人吹角可矣及長夢騎五色獅子  
後果如母所料云

南史

虎

白虎

堯爲天子季秋下旬夢白虎遺吾馬喙子其母曰扶始升

大獸



高丘睹白虎上有雲感已生皐陶索扶始問之如堯言明  
於刑法罪次終始故立皐陶爲大理

春秋元命苞

### 白虎齧左驂馬

二世三年自關以東大氏盡畔沛公將數萬人已屠武關  
趙高恐二世怒誅及其身乃謝病不朝見二世夢白虎齧  
其左驂馬殺之心不樂怪問占夢卜曰涇水爲祟二世乃  
齋於望夷宮欲祠涇沈四白馬使使責讓高以盜賊事高  
懼乃詐爲有大賊使其弟郎中令趙成爲內應遣其圜吏  
陽令閭樂將吏卒千餘人至望夷宮殿門縛衛令僕射曰  
賊入此何不止遂斬衛令直將吏入行射郎宦者大驚或

走或格格者輒死死數十人郎中令與樂俱入射上幄  
坐幃二世怒召左右左右皆惶擾不關閭樂前卽二世數  
曰足下驕恣誅殺無道天下共畔足下足下其自爲計二  
世自殺

史記

### 虎啣雷公

曹爽夢二虎啣雷公雷公若二升椀放著庭中爽惡之以  
問占者靈臺丞馬訓訓曰憂兵訓退告其妻曰爽將以兵  
亡不出旬日已而果爲司馬懿所害

世說

### 虎噬傷死

唐晉陽縣有人殺其妾妾將死言曰吾無罪爲汝所殺必

報後數年殺妾者夜半起至母寢呼其母母問故其人曰適夢爲虎所齧傷甚遂死覺而心驚悸甚故特啓之母曰人言夢死者反生夢想顛倒故也汝何憂然汝夜來不飯牛亟飯之乃往飯牛閭中見物似牛之脫乃前執之不知其虎也遂爲所噬其人號叫竟死時人以虎爲所殺之妾也

紀聞

### 虎行月中

宋滕元發母夢虎行月中墮其室遂生元發舉進士授大理評事召試爲集賢校理以直道策名於英神哲三朝

### 虎頭洲

宋治平中士子李權夢人張樂送之於虎頭洲上俄而登科蓋虎頭虎榜頭也

### 囚化爲虎

洪起畏爲浙西提刑夜夢錄囚十八人內一人化爲虎寤而異之明日見所解賊徒數與夢合而張瑄在其中洪奇其狀特貸其死未幾宋亡而瑄以漕運貴顯乃給洪終身以報全護之恩

### 身化爲虎

鄴中楊真者癖好畫虎畫則每坐臥必觀之旣老臥疾召兒孫謂之曰我平生不合癖好畫虎每夢中多與群虎游

至晚年尤甚我方恐懼今又夢身化爲虎覺旣久而方復  
人身我死之後恐必化爲虎兒孫輩遇虎慎勿殺之其夕  
卒家方謀葬其尸忽化爲虎跳躍而出其一子逐出觀之  
虎回食其子而去數日忽家人夜夢真歸謂家人曰我已  
爲虎甚是安健但離家時便得一人食之至今猶不飢

爲虎所逼

詳人身部李士寧

黃冠以袖障虎

詳帷服部蘇長公軾

大象

會稽張茂嘗夢大象以問萬推曰君當爲大郡而不能善  
夫象者大獸取其音獸者守也象以齒焚其身後必爲人  
所殺至永昌中爲吳興太守值王敦問鼎茂執正不移致  
遣沈充殺之

異苑

### 金象飛越

呂光攻龜茲城夜夢金象飛越城外光曰此謂佛神去之  
胡必亡矣已而果平龜茲

史

### 白象

金齒人周玉爲人醇朴至老不識衡量嘗夢白象詰旦而  
生子奕中嘉靖戊子鄉試知灌縣縣瘠土又當咸茂二邊

走獸

餉道爽食不兼味以廉靖聞

卷八

熊羆虺蛇

下莞上簟乃安斯寢乃寢乃興乃占我夢吉夢維何維熊  
維羆維虺維蛇大人占之維熊維羆男子之祥維虺維蛇  
女子之祥

詩經小雅斯干之六十七章言夢  
熊羆則生男夢虺蛇則生女

黃熊入寢門

鄭子產聘於晉晉侯有疾韓宣子逆客私焉曰寡君寢疾  
於今三月矣並走群望有加而無瘳今夢黃熊入於寢門  
其何厲鬼也對曰以君之明子爲大政其何厲之有昔堯  
巡鯀於羽山其神化爲黃熊以入於羽淵實爲夏郊三代

祀之晉爲盟主其或者未之祀也乎韓子祀夏郊晉侯有  
間賜子產莒之二方鼎

左傳

### 熊羆羆大

趙簡子疾五日不知人大夫皆懼醫扁鵲視之出董安于  
問扁鵲曰血脉治也而何怪在昔秦穆公嘗如此七日而  
寤寤之日告公孫支與子輿曰我之帝所甚樂吾所以久  
者適有學也帝告我晉國將大亂五世不安其後將霸未  
老而死霸者之子且令而國男女無別公孫支書而藏之  
秦識於是出矣獻公之亂文公之霸而襄公敗秦師於殽  
而歸縱淫此子之所聞今主君之疾與之同不出三日疾



必間間必有言也居二日半簡子寤語大夫曰我之帝所  
甚樂與百神游於鈞天廣樂九奏萬舞不類三代之樂其  
聲動人心有一熊欲來援我帝命我射之中熊熊死又有  
一羆來我又射之中羆羆死帝甚喜賜我二笥皆有副吾  
見兒在帝側帝屬我一羆犬曰及而子之壯也以賜之帝  
告我晉國且世衰七世而亡羸姓將大敗周人於范魁之  
西而亦不能有也羸趙姓也周人謂衛也  
晉亡之後周取衛地今余思虞舜之  
勳適余將以其胄女孟姚配而七世之孫董安于受言而  
書藏之以扁鵲言告簡子簡子賜扁鵲田四萬畝他日簡  
子出有人當道辟之不去從者以聞簡子召之曰譖吾有

所見子晰也

是前夢所見者知其名曰子晰也

當道者主君之疾臣在帝

側簡子曰然有之子之見我我何為當道者曰帝令主君

滅二卿夫熊與羆皆其祖也

范氏中行氏之子也

簡子曰帝賜我二

笥皆有副何也

副謂皆子姓也

當道者曰主君之子將克二國於

翟皆子姓也

謂代及智是也

簡子曰吾見兒在帝側帝屬我一翟

犬曰及而子之長以賜之夫兒何謂以賜翟犬當道者曰

兒主道之子也翟犬者代之先也主君之子且必有代及

主君之後嗣且有華政而胡服并二國於翟簡子問其姓

而延之以官當道者曰臣野人致帝命耳遂不見後二年

中行文子范昭子作亂簡子逐范中行而竟有邯鄲栢人

之地奉邑侔於諸侯矣簡子卒襄子立遂并代地而滅智伯至武靈王胡服騎射而趙益強大

史記

### 大羆

苻健母羌氏夢大羆而孕遂生健及長勇果便弓馬好施善事人後襲父洪位遂稱帝

北史

鹿

### 蕉鹿

鄭人有薪於野者遇駭鹿擊而斃之恐人見之也遽而藏諸隍主覆之以蕉不勝其喜俄而遺其所藏之處遂以爲夢焉順途而詠其事傍人有聞者用其言而取之既歸告其室人曰向薪者夢得鹿而不知其處吾今得之彼直真

夢者矣室人曰若將是夢見薪者而得鹿耶詎有薪者耶  
今其得鹿是若之夢真耶夫曰吾據得鹿何用知實夢我  
妻耶其妻又疑其為夢薪者歸復其真夢藏之之處又夢  
得之之主案所夢而尋得之遂訟而爭之歸之士師士師  
欲二分之一以聞鄭君皆互有夢覺之說相國曰欲辨夢覺  
惟黃帝孔丘

列子

### 沙上群鹿渡水

唐賊將史思明僭稱大號在永寧時以泥城未畢怒其孽  
子朝義云待收屯州斬却此賊朝義大懼乃與其將駱悅  
謀圖思明一夕思明夢而驚悟據牀惆悵左右問其故曰

吾夢見水中沙上群鹿渡水而至鹿死水乾言畢如廁其  
伶人相謂曰鹿者祿也水者命也胡祿命盡矣已而駱悅  
入問思明所在衆指在廁思明覺變踰垣入廐取騎出奔  
悅令周子俊射中其臂落馬擒赴柳泉驛縊殺之

唐史

### 岐角鹿負圖籍

正德乙亥重九太倉王翁湧夢一岐角鹿負圖籍而入室  
是夕得子遂名之曰夢祥字之曰奇徵以志夢也身雖未  
踰素封而生二丈夫子以文章氣節陟尊顯累封至詹事  
學士云

行狀

### 二鹿大小不倫

甲子秋予兄弟應試南都予夢二鹿馴擾於庭但大小不  
倫放榜後予與季弟燕翼與焉說者以爲鹿宴鹿鳴也大  
小不倫季弟時方弱冠與予年齒不倫也後季弟不幸短  
命然則鹿之小者抑豈其祿命之不永耶

得鹿皮十一領

詳什百部梁吉王瞻

猿

猿墮前

張氏羅江士人女其母楊氏寡居一日親黨有婚會母女  
偕往其典庫雍乙者從行既就坐乙先歸會罷則乙死庫  
提點刑獄張文饒疑楊有私殺乙以滅口遂命劾治并逮

其女考掠無實毋絕而復甦者屢辭終不服一日女謂獄吏曰我不勝笞毒將死矣願一見毋吏憐而許之謂毋曰毋寧死箠楚不可自誣女今死將訟寃於天言終而絕於是連三日地大震聲如雷天雨雪屋瓦皆落邦人震恐勘官李志寧疑其獄夕禱於天俄假寐廳事恍夢猿墮前驚悟索之不見志寧自念非殺人者袁姓乎門卒忽言張氏饋食之夫曰袁大明日袁至執之袁遽曰願就死問之云適盜庫金會乙歸遂殺之楊乃得免時女死纔數日獄上郡勝所居曰孝感坊

宋史

猴

車中猴

尼妙寂初嫁大賈任華其父升與華往長沙寂忽夢父泣  
謂曰吾與汝夫湖中遇盜殺我者車中猴東門草夢其夫  
曰殺我者禾中走一日夫有李公能辨隱語謂曰殺汝父  
者申蘭殺汝夫者申春耳猴申生也車去兩頭爲申字門  
東草爲蘭字禾中走者穿田也亦申字一日加夫爲春字  
妙寂乃易男服泛江湖間有申村村中有申蘭兄弟因往  
求傭餘年無知其非丈夫者二盜飲醉妙寂奔告有司而  
獲之詞伏就法乃復從釋教云

史

### 神責殺猴

南野人伍寺之見社樹上有猴懷孕便登樹擺殺之夢一



人稱神責以殺猴之罪當今重謫不半年寺之病作醫不

能療遂卒

述異記

狼

狼啖一脚

詳人身部張邈

狸

狸無首

曾子夢狸無首作殘形操

韓子

馬

三馬同食一槽

曹操聞司馬懿有狼顧相又嘗夢三馬同食一槽甚惡焉  
因謂丕曰司馬懿非人臣也必預汝家事後與師昭相次

當國竟遷魏鼎云

魏史

河神請馬

晉明帝時獻馬者夢河神請之及至與帝夢同即投河以奉神始太傅褚裒亦好此馬帝云已與河神及裒卒軍人見裒乘此馬

孔約志怪

乘馬飛半天而墜

崔慧景之逼長沙宣武王入援至越城夢乘馬飛半天而墜而梁武所馭化爲赤龍騰虛獨上

梁書

舍中馬舞

黃平夢舍中馬舞數十人向馬拍手問索統統曰馬者火也舞爲火起向馬拍手救火人也平未歸而火作

史

馬停水中

苻融爲司隸校尉時有京兆人董豐游學三年而返過宿妻家是夜妻爲賊所殺妻兄疑豐殺之送豐有司豐不堪楚掠誣引殺妻融察而異之問曰汝行往還類有怪異及卜筮否豐曰初將發夜夢乘馬南渡水反而北渡復自北而南馬停水中鞭策不去俯而視之見兩日在水下馬左白而濕右黑而燥寤而心悸竊以爲不祥還之夜復夢如初問之筮者筮者云憂獄訟遠三枕避三沐旣至妻爲具沐夜授豐枕豐記筮者之言皆不從妻乃自沐枕枕而寢融曰吾知之矣周易坎爲水馬爲離夢乘馬南渡旋北而

南者從坎之離三爻同變變而成離離爲中女坎爲中男  
兩日二夫之象坎爲執法吏吏詰其夫婦人被流血而死  
坎二陰一陽離二陽一陰相乘易位離下坎上旣濟文王  
遇之囚羑里有禮而生無禮而死馬左而濕濕水也左水  
右馬馮字也兩日昌字也其馮昌殺之乎於是推檢獲昌  
而詰之昌具首服曰本與其妻謀殺董豐期以新沐枕枕  
爲驗是以誤中婦人也

北史

### 駿馬

傳融性豪俠有三子靈慶靈根靈越並有才力融以自負  
謂足爲一時之雄嘗謂人曰吾昨夜夢有一駿馬無堪乘

者有一人曰惟傳靈慶堪乘此馬又有弓一張亦無人堪  
引人曰惟有傳靈根可彎此弓又有數帙文書人皆讀不  
能解人曰惟傳靈越能解此文後靈慶為蕭斌所殺靈根  
靈越奔河北靈越為青州刺史具丘子靈根為臨齊副將  
鎮明潛壘復欲南奔為臨齊人所殺靈越以從于勛舉兵  
為宋明帝所殺

北史

使君遣我牧馬

襄陽蘇嶺山廟門有二石鹿夾之故謂之鹿門山習氏記  
云習郁當為侍中從光武幸黎丘郁與光武俱夢見蘇嶺  
山神因使立祠郭重產記云雙石鹿自立如鬬採伐人常

過其下或有時不見鹿因是知有靈瑞梁天監初有蜂湖  
村人於此澤間獵見二鹿極大有異於恒鹿乃走馬逐之  
鹿卽透澗直向蘇嶺人逐鹿至神所遂失所在唯見廟前  
二石鹿獵者疑是向者鹿所化遂回其夜夢見一人著單  
巾幘黃布袴褶語云使君遣我牧馬汝何驅迫賴得無他  
若見損傷豈得全濟

襄陽記

### 乘白馬入梨山

建州梨山廟土人云故相李回之廟回貶爲建州刺史後  
卒于臨川卒之夕建安人咸夢回乘白馬入梨山及凶問  
至因立祠焉世傳靈應

當斷馬足

牽騰以咸和三年爲沛郡太守出行不節夢烏衣人告云何數出不輟唯當斷馬足騰後出行馬足自斷

幽明錄

洗白馬

威遠軍小將梅伯成善占夢有優人李伯憐遊涇州乞錢得米百斛及歸令弟取之過期不至夜夢洗白馬訪伯成占之伯成杼思曰凡鄆人好反語洗白馬濕白米也君所憂或有風水之虞乎數日弟至果曾於渭河中覆舟

馬無前足

王蜀時有朱姓者貧賤客于成都因寢旅舍夢中有人扣

扉覓朱少卿其聲甚厲驚覺訪之寂無影響復睡夢中又連呼之俄見一人手中執一卷云少卿果在此朱曰吾雖姓朱非少卿其人遂卷文書兩頭只留一行以手遮上下示之果有朱少卿三字續有一人自外牽馬一疋直入云少卿領取朱視之其馬無前足步步側蹶匍匐而來其狀苦楚朱大驚而覺常自惡之後蜀王開國有親知引薦累至司農少卿無何膝上患瘡雙足自膝下俱落痛苦經旬而死夢乃驗

王氏見聞

### 馬缺一耳

丁元珍嘗夜夢與歐陽修至一廟出門見馬缺一耳後元



珍除峽州修除夷陵令一日同祠沂謁黃牛廟入門惘然  
皆如夢中所見門外石馬缺一耳相視大驚以爲事有前  
定如此云

宋史

### 馬乘一兒

元劉述四十未有子嘆曰天果使我無子則已有則必令  
讀書一夕夢神人以馬乘一兒送至其家曰善養之旣而  
得子名之曰駟字夢驥後改名因字夢吉三歲日記千言  
七歲後屬文兩膺聘命遂爲名儒云

元史

### 龍子立階下

何學憲景明得一馬齒小而良丁卯歲季夏十五夜何忽

夢一龍子立階下跼蹐而死夢警僮在外呼曰廐馬死廐  
馬死何怪而惜之作悼馬詩十韻云乘南方踰歲何期病  
忽危四蹄猶未繫雙淚泫長垂渥水千年降房星一夜墮  
早逢田子嘆終遺塞翁悲顧影辭金絡遺骸戀敝幃詎能  
酬飼秣那復効驅馳苜蓿殘空櫪蕪苔滿故池風塵思駿  
力烟海失龍姿惆悵玄黃句淒涼赭白詞平生精志在不  
媿主人知

何氏集

### 騎馬上天門

太宗伯秦公鳴雷夢騎馬飛上天門無何及第

狀元錄

### 走馬上山

詳地理部敦煌郡主簿

馬奪其首

詳文翰部馬鐸

皎皎白駒

詳文翰部杜牧

驢

一人乘黑驢

秦苻生每宴集後入者皆斬之尚書郎杜慈奔馳疲倦假  
寢省中夢一人乘黑驢曰寧留而同死將去而獨生慈聞  
驚覺取馬遁走乃免餘皆斬

廣古今五行記

着緋乘驢

張鷟初爲岐王屬夜夢着緋乘驢夢中自怪我衣綠乘馬  
何爲衣緋却乘驢其年應舉及第授鴻臚丞未經考而授  
五品此夢始應

朝野僉載

### 乘驢渡水

衛中行爲中書舍人時有故舊子弟赴選投衛論囑衛欣  
然許之駁牒將出其人忽夢乘驢渡水蹶墜水中登岸而  
靴不沾濕訪之秘書郎韓衆衆被酒戲曰公今年選事不  
諧矣據夢衛生相負足下不沾及牒出果然

酉陽雜俎

### 牛頭流血

蔣琬見推之後夜夢有一牛頭在門前流血滂沱意甚惡

之呼問占夢趙直直曰夫見血者事分明也牛角及鼻公  
字之象君位必當至公大吉之徵也後果驗云蜀志

白牛跛脚

唐盧叔敏崔祐甫之表姪也祐甫初拜相有書與盧令應  
明經舉盧遂赴京行李貧困有驢兩頭一奴纔十餘歲初  
發縣有一紫衣人與盧同行云送書狀辭氣甚謹盧以僮  
僕小甚利其作伴扶接鞍乘每到店必分以茶酒至鄂嶺  
早發十餘里天纔明紫衣人與小奴驅驢在後忽聞奴叫  
呼聲云被紫衣毆擊盧曰奴有過但言何得便自打也言  
訖見紫衣人懷中抽刀刺奴洞腸流血生乃驚走馳數十

步紫衣遂及以刀刺倒與奴同死時緱氏尉鄭楚相與盧  
中外兄弟晨起於廳中忽困睡夢盧被髮血汚面目手牽  
一白牛謂尉言已被賊殺狀云賊今未可得兄但記明年  
八月一日平明賊從河中府與同黨買牛來於此過牽此  
牛跛左脚入西郭門最後驅者即是鄭驚覺遂言於同僚  
至明年七月末鄭與縣宰計議五更潛布弓矢手力於西  
郭門外鄭亦自往伏於路側至日初出果有人驅牛自西  
來者後白牛跛左脚行遲不及其隊有一人驅之其牛乃  
鄭夢中所見盧生牽者遂擒掩之并同黨六七十人盡得驅  
跛牛者乃殺盧賊也問之悉伏

逸史

北山下爲牛

唐灊渭間有婦謝氏女適來阿照謝氏亡託夢于來氏女  
曰我生時酤酒取價太多量酒復少今坐此罪於北山下  
人家爲牛近被賣與法界寺夏侯師今將我向城南耕稻  
田非常辛苦及寤其女涕泣爲阿照言之卽就寺訪之云  
近於北山下買得一牛見在城南耕地其女涕泣求請夏  
侯乃遣人送其女就之此牛平常唯一人禁制若遇餘人  
必墜梁觶觸見其女至乃舐其遍體又流淚焉女卽是就  
夏侯贖之牛乃隨女去在阿照家養飼女常呼爲阿娘承  
奉不闕

冥報記

## 暫假爾牛

隴州吳山縣人一夕皆夢有人乘白馬語曰我欲移居暫假爾牛言訖卽過及明數百家牛皆被體汗流如水是日縣南山曲出一湫方圓百餘步里人以此湫因牛而遷謂之特牛湫獨異志

## 牛兩尾

洛州杜玄有牛一頭玄甚憐之夜夢見其牛有兩尾以問占者李仙藥仙藥曰牛字有兩尾失字也經數日果失之朝野僉載

## 牽牛陷澤中



湯御史鴈在弘治初年以敢言自負爲大臣劉吉所嫉吉  
啗御史魏璋以刺史伺鴈鴈家壽州其知州劉槩與書言  
嘗夢一人牽牛陷澤中鴈手提牛角引之而上蓋以人牽  
牛象國姓下澤危兆引之而上賴鴈安之也鴈出書示客  
璋遂以此劾之鴈下獄

白色土牛

王宗伯華於成化甲午下第歸甯方伯竑聘爲其子講學  
乃自浙抵祁陽居於梅庄書屋明年己未謝學士遷狀元  
及第甯賀曰先生與謝公齊名今謝公及第此彙征之兆  
也是夜夢歸鄉邑如童稚時逐衆迎春東郭門外衆昇白

色土牛一覆以赭蓋旌纛幡節鼓吹前導杜方伯其肩輿隨於後自東門入至乃止既寤未解其兆明日以語賓賓不應久之屈指作迴輪者再作而曰是狀元之兆也牛一元大武也春歲之首而試之期也狀元亦謂春元也金色白其神爲辛牛之神丑也中之歲其以辛丑乎王曰鼓吹前導者何曰是所謂傘蓋儀從送歸第者也曰奚爲而杜乃隨之曰以傘蓋從者實京兆尹是歲京兆尹其必杜乎王聞而歎之曰子之言殆隍中之鹿也甯私志之歲丁酉王復下第奔走江湖夢之真妄不復記憶庚子乃領薦鄉闈明年辛丑試春官得雋入奉臨軒之對果得狀元及第

傳臚畢承制送歸長安私第者果杜也悉如甯之所解云  
王宗伯自作記

### 牛首

丁丑歲殿撰沈公懋學以舉子入試禮闈場事畢夢衆人扛一牛至其寓沈怒仗劒出斬牛牛首墮其前衆兢持牛體出放榜後向予言之予時下第將南下謂沈曰卿此試幸不作會元將於廷試驗之矣丑牛也首元也衆分其體而卿得其首非元乎已而廷試果第一

### 如田單火牛

詳飛鳥部顧文康

羊  
群羊負魚

趙主石季龍嘗晝寢夢見群羊負魚從東北來寤以訪佛  
圖澄澄曰不祥也鮮卑其中有中原乎蓋以羊與魚爲鮮字  
也後果爲慕容儁所殺

北史

山上盡目皆羊

唐李德裕爲太子少保分司東都嘗召一僧問已休後僧  
云公災當萬里南去曰南去遂不還乎僧曰當還耳公訊  
其事對曰相國平生當食萬羊今食九千五百矣所以當  
還者未盡五百羊耳公慘然而嘆曰吾師果至人且我元  
和十三年爲丞相張公從事嘗夢行晉山見山上盡目皆

羊有牧羊者十數迎拜我我因問牧者牧者曰此侍御平生所食羊吾嘗識此夢不洩於人今者果如師之說耶後旬日振武節度使米暨遣使饋金一封上書准四百羊公大驚卽召告其事僧嘆曰萬羊將滿公其不還公曰吾不受亦可免耶曰羊至此已爲相公所有公戚然不悅旬日貶潮州司馬連貶崔州司戶竟沒於荒裔

太平廣記

### 羊并二羔

火井李明府偶宿錄事私第夢素衣婦人引二子來乞命李不解已而復夢婦人自言爲錄事妻前身因妬繆以盜釵殺其懷胎婢胎有二子今我化作羊并二羔受殺已償

冤債訖釵見在堂西拱科內煩告主人以取釵爲驗勿食  
羊肉李驚起召問主人則一羊二羔已剖具爲說夢見釵  
遂埋此羊相與歎異

報應錄

### 青羊白頭

唐韋慶植有女先亡韋夫婦痛惜之後二年韋將讌客家  
人買得羊韋妻夢見亡女着青練裙白衫頭髮上有一雙  
玉釵是平生所服者來見母涕泣言昔常用物不語父母  
坐此業報今受羊身來償父母明旦當見殺青羊白頭者  
是特願慈恩垂乞性命母驚寤旦自往觀果有青羊項膊  
皆白頭側有兩條白如玉釵形母悲泣止家人勿殺待韋

至放釋之俄而韋至催食宰夫白云夫人不許殺青羊韋  
怒卽令殺之宰夫懸羊欲殺客數人已至恍惚見懸一  
子容貌端正客等驚愕止宰夫宰夫懼韋怒遂殺之旣而  
客坐不食羊韋怪問之客具言其故韋悲痛發病遂不起  
法苑珠林

### 化羊爲典所殺

唐高宗時徐慶爲征遼判官在軍忽夢已化爲羊爲一典  
所殺覺後悸懼流汗至曉此典詣慶慶問夜來有所夢否  
典云夢公爲羊手加屠割意甚不願爲官所使制不自由  
慶自此不食羊肉至則天時慶累加至司農少卿雍州司

馬時典已任大理獄丞後慶被誣與內史令裴炎通謀應英公徐敬業被執送大理忽見此典押獄慶便流涕謂之曰征遼之夢今當應之及被殺戮之日竟是此典引出廣古今五行記

### 盜羊入獄

許超夢盜羊入獄元稹解之當得城陽令後封陽城侯陽維俎

### 人擁一羊遺之

宋太祖六世孫秀王偁夫人張氏夢人擁一羊遺之已而有娠生伯琮于秀州及元懿太子薨高宗未有後昭慈聖



獻皇后語以異夢高宗曰太祖以神武定天下子孫不得  
享朕若不法仁宗爲天下計何以慰在天之靈於是以選  
育宮中後立爲皇太子更名昀卽帝位是爲孝宗

宋史

### 羊踏菜園

有人常食菜忽食羊夢五臟神曰羊踏破菜園矣

韻府

### 羊頭

柯學士潛常夢禱九里廟與賓友讌會柯坐首席須臾宰  
夫以一羊頭獻於前寐而識之至辛未果中狀元符夢兆  
云

狀元錄

### 執弩驅羊

詳成器部黃帝

羊

犬羊各一在御座

太醫令朱耽嘗直禁省夜夢犬羊各一在御座覺而惡之告人曰犬羊者非佳物也今據御座將有變乎旣而天子蒙塵侯景登正殿焉

梁書

犬

兩黑犬嗥以南嗥以北

吳王夫差夢兩黑犬嗥以南嗥以北公孫聖曰黑者陰也北者匿也詳地部

愚意犬吠非其主嗥以南者越將至也嗥以北者齊未服也

白犬自天而下

王敦舉兵犯順病作夢白犬自天而下嚙之覺後病轉劇

乃以身後囑錢鳳俄而敦死

晉書

### 綠色犬

張天錫在涼州夢一綠色犬甚長從南來欲昨天錫天錫在牀上避之乃墮地後苻堅遣苟萇著綠地錦袍從南來攻入門大破之

李產集異傳

### 二黑犬過堂下

宋徐元杰嘗夢神人繫二黑犬過堂下授之是歲登科之文有默思默通云者主司見之以爲神語乃悟默字有黑犬重複用之二黑犬之徵也

### 赤犬化爲龍

林環往九仙觀卜兆路遇道士云爲代占夢赤犬化爲龍  
明年應作狀元也乃詭說之詞及赴京適符給語按此夢與鴛鴦事同

### 犬肉一片

林環將試春闈夢其友李文淵送犬肉一片環嚙一臂受  
之迨揭榜環狀元及第蓋一片犬肉乃狀字嚙一臂類元  
字後官文淵閣學士始悟夢李文淵者乃先兆也夢徵錄

### 犬肉一片置几上

葉祖洽赴省試夢邵武廣祐廟神將犬肉一片置几上命  
食之明年葉作大魁方悟一片犬肉置几上乃狀元二字

也八閩志

竹片反押青犬頭

張諭德信舉鄉薦赴京夢以竹片反押青犬頭置兀上詳者曰竹片反押青犬乃狀字置兀上轉元字况當甲戌必魁天下果如所言

狀元錄

帝屬一翟犬

詳本部趙簡子

豕

勞我以豕

朔人獻燕昭王以大豕曰養奚若使曰是豕也非大豕不居非人便不珍今年百二十矣人謂豕仙王乃命豕宰養

之大如沙獐足如不勝其體甚巨無用燕相謂王曰奚不  
享之王乃命宰夫膳之夕見夢於燕相曰造化勞我以豕  
形食我以人穢吾患其生久矣仗君之靈得化吾生始得  
爲魯津之伯欣君之惠將有報焉燕相遊乎魯津有赤龜  
奉壁而獻

符子

### 赤虺雲中下

漢景帝在東宮納王美人有娠景帝夢一赤虺從雲中下  
召占者姚翁問之翁曰吉祥也必主命世之人攘夷狄而  
獲嘉瑞爲劉宗盛主也及生男因名虺焉是爲武帝後改  
名徹

武帝內傳

豬啣足

漢前將軍關羽初出軍圍樊夢豬啣其足語子平曰今年  
衰矣然不得還果為吳人所襲

蜀志

一豕不可得

齊趙隱字彥深為大行臺都官郎中從齊文襄征潁川時  
引水灌城城雉將沒魏將王思政猶欲死戰文襄令隱單  
身入城告喻即日降之便手牽思政出城文襄謂隱曰吾  
昨夜夢獵遇一群豕吾射盡獲之獨一大豕不可得卿言  
當為吾取須臾獲豕而進今夢驗矣

北史

作猪償債

隋民皇甫遷不事生理母嘗取錢置牀上向舍後遷從外  
來不見人便偷錢去母還覓錢不得遂勘合家良賤悉加  
鞭箠至後年遷亡其家猪生一狔子賣與遠村社家遂託  
夢于婦曰我是汝夫爲盜取婆錢枉及合家浪受楚拷今  
我作猪來償債將賣與社家縛我欲殺汝是我婦何忍不  
語男女贖我婦忽寤因起報姑姑曰吾夢亦如之遲明令  
兄齋錢詣社官收贖之弘法寺僧靜琳是遷鄰里親見其  
猪嘗話其事

法苑珠林

### 母猪極大

饒陽李瞿曇勳官祿滿選夜夢一母猪極大語李仙藥仙



藥占曰毋猪独主也君必得屯主數日果如其言

大豕決都城

至正二十二年元順帝一夕夢大豕決都城而覆因禁  
民畜猪比 天兵至柳林順帝召百官議戰守計忽有二  
狐自內殿出帝歎且泣卽命開建德門北去明年 高皇  
聞其駐應昌也馳書開示禍福順帝因荅詩云金陵使者  
渡江來漠漠風烟一道開旺氣有時還自息 皇恩何處  
不昭回信知海內皆王土亦喜江南有俊才歸去誠心煩  
爲說春風先到鳳凰臺蓋豕者朱姓決城而入狐者胡人  
下殿而走天之示人良亦顯矣

明興雜記

貓

貓臥堂限

唐薛季昶為荊州長史夢貓伏臥於堂限上頭向外以問占者張猷猷曰貓者爪牙伏門限者閭外之事君必知軍馬未旬日除貴州都督嶺南招討使

朝野僉載

鼠

鼠入衣下

齊婁太后孕襄城博陵二王夢鼠入衣下

北史

大鼠出入棺中

隴西李彊名妻崔氏甚美方暑月卒已埋彊名痛之不已數日妻見夢曰吾命不合絕然吾形已敗帝命天鼠為吾生肌膚十日後當有大鼠出入棺中然當封閉門戶待七

七日開吾門出吾身吾卽生矣十餘日忽有白鼠數頭出入棺所因異之試發其棺見妻骨有肉生焉復閉之積四十八日其妻又見夢曰吾明晨當活盡出吾身既曉彊名發之妻則甦矣扶出浴之美倍於舊居無何復病一日遂亡計其再生纔百日耳或曰有物憑焉

記聞

### 吞白鼠

釋智顗母徐氏夢吞白鼠如是再三怪而上之師曰白龍之兆也乃誕育顗

神僧傳

### 黃鼠狼過江

寶曆士人黃登同數人在吉州神岡山廟祈夢登不寐餘

皆熟睡少頃皆魘皆呼曰打打問之云夢黃鼠狼過江也  
登乃子生姓又合私自喜是年得第

夢談

夢占類考卷三